



WANTOK



Namba 1832
Wan Wik, Septemba 17 - 23, 2009

Niuspepa Bilong Yumi Ol PNG Stret! K1 tasol
long olgeta hap

Makim Indipendens...



Lukaut long sik kolera!
Parkop laikim klinpela
pasin long Mosbi
PES 3

Indipendens Spesol
PES 4-13

1.02 bilien manmeri
hangere long wol
PES 26

Putim Digicel Bampa
Stika lo kar blo yu na
yu inap pilai long

Spin to Win

na winim cash
moni inap lo

K100,000



Putim Bampa Stika
igo pas lo kar blo yu
na yu inap winim
K20 Flex Kad!
Na sapos yu tokim
mipela wai yu laikim
stret Digicel bai
yu go insait lo dro
lo winim inap lo
100,00 kina lo SPIN
na WIN! Promosen
igo olgeta long mun
Septemba.

Digicel

Elkapa, Stretpela moa Network bilong PNG.



Digicel givim mani long PNG

RETPELA mobail telepon kampani, Digicel, i wok long pulim planti moa manmeri long ol pilai resis bilong winim mani bilong ol.

Promosen bilong Digicel Papua Niugini (PNG) nau i lukim tripela kain i wok kamap insait long kantri.

Namba wan bikpela pilai resis bilong ol em ol i mekim wantaim PNG FM radio stesin. Nem bilong dispela namba wan resis em ol i kolim 'All I Need Is My Digicel' (Digicel bilong mi em olgeta samting mi i mas i gat).

PNGFM, aninit long Nau FM na Yumi FM radio stesin bilong en i save ringim ol namba na ol manmeri i mas bekim "All I Need Is My Digicel". Sapos ol i bekim stret, ol bai winim mani mak i stap pinis. Sapos ol i tok 'halo' o narapela kain bekim, bai ol i abrus, na prais mani bai go antap narapela K300.

Aninit long dispela promosen, i gat narapela we ol i gat ol stika bilong kar. Sapos yu baim wanpela K20 flex kad, yu bai kisim wanpela stika. Yu mas putim dispela stika long bampa bilong kar na sapos ol lain bilong Digicel i lukim yu, ol i ken askim yu, watpo na yu



WINMAN: Sif eksekutiv opisa bilong Digicel, John Mangos, i sekan long John Orea na givim em sekmani inap long K5000.

save laikim Digicel. Sapos bekim bilong yu i wanpela gutpela bekim tru, yu ken gat sans long spinim wil na winim ol kain kain manimak kesmani.

Aninit long dispela bampa stika pilai, Digicel i wokbung wantaim *Wantok Niuspepa* long Mosbi tasol long givim fri wanpela bampa stika wantaim wanwan kopi bilong *Wantok Niuspepa*.

I gat 7-pela manmeri i win long dispela bampa stika promosen pinis.

Las wik Fonde, John Orea

bilong Sentrel provins i winim K5000 bihain long em i givim wanpela gutpela bekim tru long askim. Em i go spinim wil na winim dispela K5000 kesmani.

Ol arapela lain i win long dispela promosen em Alphonse (K2000), Sibon (K4400), Emma (K2,000), Rudisckson (K3,000), Josephine (K50,000) na Joe (K5,000). Nau John Orea i winim K5,000. Olgeta dispela inapim stret K71,400 Digicel i givim pinis long ol kastoma i winim pilai resis bilong en.

Ami bilong yu

Andrew Molen i raitim

OL AMI bilong Papua Niugini (PNG) na Australia i no stap long pait tasol. Ol i gat wok tu long helpim komyuniti na strongim pasin bilong gutpela sindaun insait long komyuniti.

Dispela em wanpela astingting we Papua Niugini Difens Fos (PNGDF) na Australian Defence Force (ADF) i save wokbung wantaim insait long ol trening na wok bilong ol.

Long Mande dispela wik ol i pinisim "Wantok Warrior" na "Exercise Pukpuk", tupela bilong tripela trening na wokbung program bilong ol we i kam aninit long operesen "Olgeta Warrior".

Dispela tupela program wantaim "Exercise Helicon Luk" em tripela program we PNGDF na ADF i save mekim ol kain kain trening na wokbung long ol komyuniti long PNG.

Narapela tupela i pinis na "Exercise Helicon Luk" bai stat dispela wik.

Bosman bilong PNGDF husat i wokim trening wantaim ADF, Leftenen kenol (LT. Col), Siale Diro i tok dispela trening i kamapim planti samting long dispela tupela ami, tupela kantri na tu ol manmeri long ol ples we trening i kamap long en.

"Ol soldia long dispela tupela kantri save mekim planti gutpela poroman na ol i save lainim planti gutpela samting long ol yet," Mista Diro i tok.

Trening bilong ol i ron inap tripela wik insait long Sentrel provins we ol i raun insait long bus bilong Gereka, ron long sip i kam long nambis long Tubusereia na Tahira na bihain go insait long bus namel long Maun Daimond na Laloki we ol i mekim liklik pait insait long bus.

Ol i pinisim dispela trening long Mande dispela wik long 17 mail wantaim liklik kaikai na malolo bipo ol PNGDF soldia i go bek long bes bilong ol na ADF i go bek long HMS Kanimbala, sip we ol i kam long PNG long en.

Dispela tupela ami givim tu sampela ol samting bilong wok gaden na pilai spots i go long komyuniti bilong Tubusereia, Gereka na Laloki we ol i mekim trening bilong ol long en.

Ol i stretim tu wara tenk bilong wan-

pela skul long Gereka na mekim aweanes long wok bilong ami na tu planti ol arapela samting ol lo na oda long dispela ol komyuniti.

"Insait long dispela ol aweanes mipela i tokim ol manmeri olsem, "Mipela em ami bilong yupela, mipela i stap long lukaut na strongim yupela na dispela em ol poroman bilong mipela long Australia," Mista Diro i tok.

Ami bilong Australia i kisim sampela ol nupela masin na save bilong pait i kam na skulim ol PNG soldia na PNG i skulim ol long ol rot bilong stap insait long bus long taim bilong pait, em i tok.

"Mipela i skulim ol long wanem hap ol i ken painim kaikai na wara na wanem samting long mekim sapos ol i stap insait long bik bus long taim bilong pait," em i tok.

Dispela em wanpela hap we PNGDF i gutpela long en na ol Australia soldia tu i amamasim long kisim dispela save long ol.

"PNGDF em ol nambawan stret long save bilong stap na pait insait long bus," Lt. Col. Rupert Hoskin bilong Australia i tok.

Em i tok tu olsem bikpela samting dispela ol trening program i save mekim em, ol i save strongim wokbung namel long PNG na Australia.

"Long sait bilong ikonomi, ami, bisnis, long intanesenel na nesenel level na tu long wanwan soldia bilong tupela kantri wantaim.

"Planti bilong mipela i mekim ol gutpela poroman na tu mipela i bungim sampela olupela poroman," Lt. Col Hoskins i tok. Hoskins na Diro i bin trening wantaim long Australia bipo na nau tupela i bung gen long go pas long ami bilong ol wanwan insait long dispela trening.

Bipo komanda bilong PNGDF, Ted Diro, i tok dispela i no namba wan taim bilong ADF na PNGDF i wokbung wantaim.

"Blut bilong tupela kantri wantaim i kapsait long pait bipo yet i kam, ol stori na pasin bilong ol long bipo i stap strong yet na i gutpela long lukim wokbung bilong ol i strong nau tu wantaim ol nupela save na masin bilong pait," jenerel Diro i tok.

OXFORD, TOK PISIN INGLIS DIKSENERI

Katim, na pulimapim oda fom daunbilo na salim i kam long Wantok Niuspepa sapos yu laik baim dispela Oxford Papua Niugini Dikseneri (Dictionary) we Wantok na Oxford i wok bung wantaim long kamapim. Dispela buk i ken helpim yu tanim Tok Pisin i go long Inglis, o Inglis i go long Tok Pisin. Hariap na kisim wanpela bilong ol dispela gutpela buk we inap strongim Tok Pisin bilong yu.

ORDER FORM

TITLE	ISBN	PRICE (incl GST)	QTY	SUBTOTAL
PNG Tok Pisin English Dictionary	9780195551129	K38.50		
				TOTAL K
				PLUS FREIGHT K
				GRAND TOTAL K

*Freight cost for our books:
 K5.00 across PNG K10.00 elsewhere
 K13.50 rest of Pacific K7.50 rest of the world

Options for Payment
 1) Direct deposit into Bank Account (details below)
 2) Mail Cheque to Word Publishing Company Ltd, PO Box 1982, 8080303, NCD
 3) Call into the office: Office 622, Section 58, Alilil West 07, Waigani DC, NCD.

Account Name: Word Publishing Company Ltd
 Account Number: 100 000 5380
 Bank: Bank of South Pacific Ltd
 Branch: Commercial Centre
 Branch Code: 8951
 Swift Code: BOSPPCPM

FAX BACK TO : (675) 325 2579

If you are ordering more than one copy please contact us for a quote.
 Phone: (675) 325 2500
 Fax: (675) 325 2579
 Email: word@wantok.com.pg

Name (print): _____ Phone: _____
 Address (print): _____

 Email: _____

 Signature: _____



Australian Government
Department of Veterans' Affairs

Yu bin halivim ol Australia soldia manmeri long Papua Niugini long Wol Woa 2? Yu wanpela Pasi Wasi Angel o meri o man bilong wanpela Pasi Wasi Angel?

Long luksave long halivim ol Papua Niugini manmeri i bin givim long ol sevismanmeri bilong Australia long Wol Woa 2, Gavman bilong Australia i kamapim Pasi Wasi Angel Komemorativ Medol. Long aplai long kisim dispela medol, plis ringim Australian Hai Komisn long telepon namba 325 9333, o salim pas i go long Locked Bag 129, Waigani NCD, o sekim websait www.dva.gov.au

Dispela Pasi Wasi Angel Komemorativ Medol em i no kam aninit long Ona na Awods sistem bilong Australia, na i nogat moni mak bilong en. Dispela medol em bilong ol Pasi Wasi Angel tasol, o ol man o meri bilong ol Pasi Wasi Angel i stap laip yet. Em i no inap long go long ol arapela wan famili bilong ol.

Pasin Tumbuna



SINGAUT BILONG HIRI KWIN: Long makim namba 34 Indipendens bilong kantri, bikpela tumbuna so bilong Sentrel provins i bin kirap long dispela wik. Dispela yangpela meri em i wanpela long 22 meri i makim wanwan ol ples long Sentrel provins. Ol i kam soim stail na bilas bilong ol long traime winim taitol bilong Hiri Kwin bilong 2009. *Poto: Andrew Molen*

Lukaut long sik kolera

Stap klin, Parkop i tok

Paul Zuvani i raitim

SIK kolera inap kam isi long Mosbi.

Ol manmeri long Nesanel Kapitel Distrik (NCD) i mas klinim ples na ol yet long abrusim dispela sik.

Dispela em toksave bilong NCD gavana Powes Parkop taim em i sanapim wanpela komiti long go raun long wanwan komyuniti long Mosbi na putim gutpela was long abrusim sik.

Siti menesa Leslie Alu bai go pas long dispela komiti na wokabout bilong komiti i stat long dispela wik.

Em i tok dispela sik kolera we i kamap pinis long Morobe provins i sik we i save kamap long ol kantri we sindaun bilong ol nogut tumas.

Papua Niugini (PNG) i no kantri olsem, sindaun bilong em i gutpela na manmeri i gat inap save bilong rot bilong stap gutpela, em i tok.

Kolera i sik pekpek wara na ol manmeri husat i kisim dispela sik bai pekpek wara hariap o klostu klostu. Dispela sik i winim pekpek wara bilong sik diaroea. Em i ken kalap hariap tru i go long narapela man-

meri.

Long dispela as Mista Parkop i bilip olsem sapos ol manmeri i no was gut sik inap kalap i go long Madang provins, Isten Hailans provins na Galp provins.

"Klinim ples bilong yupela. Noken pekpek nabaut.

"Wasim han bilong yupela taim yupela i redim kaikai, i laik kaikai o bihain long toilet.

"Noken salim na baim ol kaikai i stap long ples klia.

"Oltaim karapim kaikai na boilim wara bipo long dring," Mista Parkop i tok.

Em i askim ol manmeri long noken kaikai buai long pablik na spet nabaut tu.

"Pasin bilong kaikai buai na spet long bas stop o trefik lait i mas pinis.

"Kain pasin i save kamapim sik long komyuniti," Mista Parkop i tok.

Moa Stori long Kolera:

- *Sik Kolera go pinis long Hailans - pes 15*

- *Pret long sik kolera pasim Madang Festival - pes 15*

Rot bilong abrusim sik kolera

OL MANMERI i mas bihainim dispela ol rot bilong daunim o abrusim kamap bilong sik kolera

Dispela ol 5-pela rot ol i mas bihainim long wanem sik kolera i wok long kamap bikpela.

• **WARA:** Boilim wara bilong dring inap long 15 minit. Putim dispela wara long klinpela botol o sospen. Noken putim kap samting i doti o han i go insait long dispela botol o sospen. Dring bihain long wara i kol.

Narapela rot em long yusim sno wait olsem Dazzle. Kapsaitim liklik Dazzle i go long namel mak bilong ai o lid bilong em. Bihain kapsaitim dispela sno wait long ai o lid i go long wara bilong dring. Dispela wara manmeri i mas skelim inap long tupela lita olgeta (olsem tupela bilong 1lita Coca-cola plastik). Larim wara i stap olsem hap aua o 30 minit bihain long manmeri i ken dring;

• **KAIKAI:** Manmeri i mas kaikai kaikai em yet o famili i kukim long haus na ol kaikai i mas tan gut;

• **HAN:** Kisim taim olsem 20 seken long wasim gut han wantaim sop na wara. Sapos nogat sop, yusim sip bilong paia

long rabim han na wasim wantaim wara. Oltaim wasim han bihain long go long toilet o bipo long kaikai;

• **LANG:** Karamapim gut ol kaikai. Dispela inap pasim lang long sindaun antap long kaikai na putim doti na

• **PEKPEK:** Yusim stret haus toilet long pekpek. Toilet i mas i gat lid o tuptup long pasim maus bilong hul. Karamapim pekpek i stap nabaut wantaim waitsan o graun. Digim hul na karamapim bihain long pekpek.

Rot bilong kamap orait taim manmeri i kisim kolera

Olsem tok i stap i gutpela long banisim sik bipo long em i kalap long manmeri.

Dispela em bikos taim kain samting i kamap em i hat long stretim hariap.

Tasol sapos i kisim dispela em ol rot bilong kamap orait.

• **ORS (Oral Rehydration Salts):** boilim wara inap long 30 minit. Larim dispela wara i kol pastaim. Bihain kisim wanpela lita na kapsaitim wanpela paket bilong ORS paura i go insait long wara na dring;

• **IV Fluids:** Dispela em bilong ol manmeri husat i kisim bikpela bagarap long kolera we maus bilong ol i drai tru, ai bilong ol i go insait, ol i nogat strong na i hap dai;

• **Antibiotics:** Long dispela helt woka i save givim doksilin long ol bikpela manmeri wantaim 300mg (dispela em long wanpela wanpela taim tasol) long daunim kamap bilong sik. Long ol pikinini na ol bikpela manmeri wantaim, ol helt woka i save yusim tetrilim (12.5m) inap long tripela de olgeta;

• **Skrui pasin bilong givim susu na kaikai long ol pikinini taim ol i kisim inap strong long dring o kisim kaikai bihain long sik;**

• **Go long ORS stua o haus long kisim paket bilong ORS.** (Toksave i go long helt woka olsem sapos inap larim wanpela paket long wan wan manmeri long nogut bihain sik i kisim ol) na

• **Sapos nogat ORS yusim sampela kain ol wara bilong strongim sikmanmeri long stap strong na kamap orait.**

CMG
motors

**ATTENTION OIL PALM MILLS, TIMBER MILLS, FLOUR MILLS, INDUSTRY
ELECTRIC MOTORS, DRIVES & TRANSMISSIONS**

- * Italian Made Power Transmission
- * Hollow or Solid Shaft Designs
- * Low Speed Applications
- * Sealed For Life
- * Alloy Light Weight
- * Special One-Off Designs



- * High Cycloid Efficiency Speed Reducer
- * Solid Drive Shaft
- * High Torque Outputs
- * Low Maintenance
- * Italian Made



Fully supported by in-house technical representative
who can answer all your motor requirements,
email: sean.sill@bishopbros.com.pg

| Phone: 300 46 | Fax: 300 47 | Email: honsales@bishopbros.com.pg |
Website: www.bishopbros.com.pg

BISHOP BROTHERS
everything for industry...

'O, Arise...'

INDIPENDENS em i taim bilong yumi olgeta Papua Niugini long amamas.

Ol wokmanmeri bilong Benk Saut Pasifik (BSP) Waigani Benking Senta i bin makim Indipendens long Tunde dispela wik taim olgeta i bilas long ol naispela meri blaus na siot na singim nesenel antem bilong kantri, pastaim long ol i opim benk long pablik.

Poto Nicky Bernard.



The Board, Management & Staff of BSP
would like to wish Papua New Guinea
Happy Independence celebrations.

BSP CELEBRATES with pride what's great about Papua New Guinea.

Since we opened our 1st branch over 50 years ago we have helped PNG grow by supporting people with all kinds of banking services for a wide variety of purposes: Business, education, homes, travel.

We've grown to become the largest bank in PNG with 35 branches nationwide and over 150 ATMs. We're growing, along with Papua New Guinea, and are the leading bank of the South Pacific, expanding into Fiji, the Solomon Islands and Niue.

We believe in, and support dreams, careers, business and the life of our country.

BSP your bank • your country
www.bsp.com.pg

Wok painimaut soim olsem PNG kisim Indipendens hariap tumas

ATING indipendens i bin kam long Papua Niugini (PNG) hariap tumas. Tasol Australia i wanbel tasol long givim.

Dispela em bikpela toktok wanpela saveman husat i save raitim histori, Profesa Hank Nelson, husat i givim moa taim long stadi na wok long PNG i mekim.

Profesa Nelson, nau i save wok olsem wanpela tisa long Australia Nesenel Yunivesiti (ANU) long Divisin bilong Pasifik na Esian Histori.

"Wok painimaut soim olsem yumi kamaut hariap tumas," Profesa Nelson i tok tokim Alan How bilong Melbon Herald Sun niuspepa.

Tasol dispela bai i no inap senisim wanpela samting, Profesa Nelson i tokim em.

Long 1971 Australia minista bilong ol Ekstenel Teritori na Kantri Pati memba, Charles (Ceb) Barnes, i bin makim taim bilong givim self-gavman na indipendens long PNG.

"Long taim Gough Whitlam i bin kisim pawa long 1972, dispela taim-tebol i redi gut pinis," Profesa Nelson i tok.

PNG i no bin i gat ol gutpela saveman long dispela taim long ronim ol sistem bilong nupela demokratik sistem bilong gavman – sait bilong judisiari, dipatmen bilong helt na foren afeas, edukesen sistem na pablik sevis.

"Long 1972, wanpela yia bipo long ful intenol self gavman, i bin i gat wanpela gavman dipatmen we wanpela man bilong PNG yet i go pas long en.

"Ol narapela man long dispela taim em ol lain bilong Australia yet," Profesa Nelson i tok.

Wok painimaut i tokaut olsem ating sapos wanpela vot i bin kamap long dispela taim long save long tingting bilong ol manmeri stret long indipendens, planti manmeri bai i no laikim indipendens.

"Australia i bin amamas long givim indipendens long PNG long tingting bilong em yet, na dispela ol as em ol gutpela as," Profesa Nelson i tok.

Long dispela taim PNG i givim planti het-pen o salens long Australia. I bin i gat sampela bikpela hevi i bin kamap long dispela taim we i lukim sampela lain i laik bruk insait long Gazel Peninsula long Is Nu Briten, Bogenvil na Papua na sans long Australia long yusim strong long sait bilong em 'em ino inap'.

"Narapela samting em boda wantaim Indonesia. Long dispela taim yet i bin gat ol lain OPM (Fri Papua Muvmen) i kalapim boda go long PNG na ol Indonesia lain i wok long bihainim ol," Profesa Nelson i tok.

I bin gat sampela birua i bin kamap pinis long boda na Australia i pret gen long wanpela birua i kamap wantaim Indonesia, em i tok.

Profesa Nelson i tok Australia i skelim olsem ating PNG i ken lukautim em yet na go het.

"Wanem samting mipela i save moa gut nau em wanem ol samting i kamap long Irak, mipela i ken lukim long Kosovo, Somalia, Hon long Afrika – olsem long wokim kamap wanpela stet em bai wanpela bikpela hatwok tru.

"Nau long dispela taim mipela i no mekim asua," em i tok.

Ol rurel distrik bagarap, na biktaun Mosbi kamap bikpela yet

JAMES KILA i raitim

SAPOS wanpela nupela man husat i stap long ples i raun namba wan taim tru i go long biktaun Mosbi, em bai guria tru long lukim ol bikpela bilding, planti ol kar na planti ol manmeri bilong olgeta hap bilong kantri i pulap i stap.

Mosbi em namba wan biktaun bilong Papua Niugini (PNG) na planti hetkwata bilong ol bikpela gavman dipatmen na ol bisnis i stap long hap.

Planti ol liklik Pasifik ailan kantri olsem Solomon Ailans, Vanuatu, na Fiji husat i raun i kam long Mosbi i save guria stret.

Wanpela poroman bilong Solomon Ailans i

tok "Mosbi siti em bikpela no moa na tarafela winim Honiara no moa." Yes. Dispela man i tokaut long Tok Pisin bilong ol lain wan-solwara long Solomons na i tokaut olsem Mosbi em i biktaun stret.

Ol bikpela gavman dipatmen i save stap long Mosbi na lukautim wok bilong bosim mani na ol sevis we i sapos long go long ol manmeri long ol rurel distrik long kantri. Tasol planti taim dispela ol sevis i no save go long planti ol rurel distrik long kantri.

Planti ol komyuniti lida long ol distrik long kantri long PNG i wok long toktok na toktok yet long wanem nogat gutpela gavman sevis i wok long go daun long ol distrik.

Planti ol skul i nogat gutpela skul saplai, na

tu planti ol tisa i no save go tumas long skul long wanem nogat ol gutpela gavman sevis i stap klostu long ol na ol i mas go long taun long kisim ol dispela sevis olsem benk, pos opis, stua kaikai na tu pe bilong ol long provinsel edukesen opis. Dispela ol samting i kamap long wanem nogat ol gavman sevis i stap long ol distrik.

Wanpela komyuniti lida long wanpela rurel ples long Obura-Wonenara distrik long Isten Hailans provins, Felix Panote i tokim Wantok Niuspepa olsem 'Diveelopmen i kamap long Mosbi tasol.'

Mista Panote i tok ol distrik i save painim hat taim tru long bringim ol wok diveelopmen igo insait long hap bilong ol long wanem ol MP i no

save kisim mani hariap i kam long Waigani.

"Planti taim ol memba i save tok olsem mani long Waigani i no redi yet.

"Man Waigani, Waigani em wanem kain nem tru ya," Mista Panote I tok.

Wantok Niuspepa I bin mekim wanpela lukluk raun i go long Is Sepik provins na i luk-save long planti ol kain kain hevi em ol rurel pipel i save bungim.

Tru tumas, ol gavman sevis bihain long 34 yia i no wok long go daun long ol rurel distrik na ol ples long PNG. Dispela em bikpela hevi tru na em bikpela salens PNG gavman i mas lukluk i go insait long en na stretim long bringim gutpela sindaun long ol manmeri long ol rurel distrik long PNG.



NOGAT SEVIS: Wanpela ples long Wara Sepik i nogat gutpela wara saplai.



KONSTRAKSEN: Biktaun Mosbi lukim moa nupela diveelopmen kamap. Ol poto: James Kila



PLES LAIN: Bihain long 34 yia, planti rurel pipel i no kisim gutpela sevis bilong gavman olsem helt, edukesen, na gutpela wara saplai na rot. Poto: James Kila

Ol pipel mas tuhat long lukim 'trupela' indipendens – MPF

James Kila i raitim

PLANTI ol manmeri insait long planti kona bilong Papua Niugini I bin kamapim kain kain selebresen long amamasim namba 34 PNG Indipendens anivesari.

Tasol wanem mining tru bilong dispela indipendens? Dispela em bikpela askim wanpela non gavman ogenaisesin em ol lokol viles pipel ol i kolim ol yet 'Madang Pipols Forum' i askim.

Siaman bilong Madang Pipols Forum, Alfred Kaket i askim strongpela kwesten olsem 'Wanem em mining tru bilong indipendens?'

Mista Kaket i tokim Wantok Niuspepa long dispela wik olsem planti ol pipel insait long PNG bai selebret long makim indipendens.

Em i tok PNG i wok long hangamap yet na i wok long kisim helpim yet long sait bilong mani na ol narapela samting i kam long ol lain long ovasis kantri. Dispela i soim olsem PNG i no indipenden.

"Mipela ol viles man husat i go pas long dispela NGO grup

mipela i lukim olsem i no gat gutpela mining long selebret long dispela indipendens de," Mista Kaket i tok.

Em i tok olsem taim ol pipel i sanap strong long ol yet, na hatwok na tuhat long kamapim wok em dispela bai soim tru olsem mipela i indipenden. Taim ol pipel yet i go pas na kamapim wok long graun bilong ol long pasin bilong 'self rilaiens' em dispela em mining tru bilong indipendens.

Mista Kaket i tok nau yet Madang i wok long lukim planti ol kain kain lain i wok long go insait long provins long mekim ol wok long graun bilong ol lokal pipel. Sampela bilong ol dispela lain i laik mekim wok long Pasifik Marin Industrial Zon (PMIZ), na tu i gat ripot pinis olsem Rimunan Hijau i muv i go insait long Madang pinis na katim timba long hap.

"Ol pipel i mas tingting gut long trupela diveelopmen na noken larim ol lain i kam na mekim wok na bagarapim bus, graun bilong yumi.

"Planti bilong ol dispela lain ovasis kampani i pinisim ol risos

long kantri bilong ol na i laik kam long kisim ol risos long PNG.

"Ol wok ol bai mekim bai i no inap stap longpela taim na dispela i ken bringim bagarap long graun bilong ol lokal pipel," Mista Kaket i tok.

Em i tok gavman i tok long pusim strong long bringim ol wok projek i go insait long Madang, tasol ol pipel i mas tingting gut na tingting strong olsem graun bilong ol em bikpela samting we ol pikinini na tumbuna long bihain taim bai yusim. Olsem na ol i mas glasim gut tru pastaim.

Mista Kaket i tok ol lain bilong Madang Pipols Forum i bin kisim askim long go toktok long sampela ol skul long Madang.

"Bikpela toktok mipela laik givim em olsem 'graun em laip' na ol sumatin tude long skul i mas skul gut na holim pas strong dispela bilip olsem graun i stap na ol i stap. Olsem na ol i mas wok hat long skul na bihain ol yet i ken kamapim ol gutpela wok long ol risos i stap long graun bilong ol," Mista Kaket i tok.



34th Indipendens Toktok bilong PRAIM MINISTA SEPTEMBER 2009



34-yia i go pinis na mi amamas gen long toktok long ol pipel bilong Papua Niugini. Mipela wokabaut bihainim longpela rot i gat planti salens.

Mipela i holim pas Kristen pasin ol i bringim long mipela long 1880s, na mipela i kisim i go insait gut long ol Melanesian kalsa bilong mipela tude.

Mipela i kisim Tok Pisin na mekim em i kamap olsem tokples bilong mipela, na tu, mipela i holim yet Motu olsem wanpela long tripela opisal tokples bilong mipela long kantri.

Pastaim tru ol pipel bilong mipela i stap long ol wanwan liklik ples bilong ol, tasol mipela i kam bung na wok wantaim aninit long kolonial edministresin. Mipela kisim dispela tu na kamap olsem wanpela kantri 34 yia i go pinis.

Tude Mama Lo (Konstitusen) bilong yumi i bungim mipela olgeta wantaim na mipela i holim pas Wes Minista sistem bilong gavman.

Papua Niugini YU WIN PINIS!

Olsem wanpela long taim lida bilong dispela kantri we i gat planti kain kain kalsa, mi save karim hevi bilong wanem ol samting we i no go gut insait long dispela kantri.

Mi karim ol dispela hevi, bikos mi yet mi laikim dispela wok long 1968 long sanap long politikel lidasip, na wantaim ol wanwok bilong mi, mipela i senisim wokabaut insait long histori na bihainim taim bilong mipela olsem wanpela pipel bilong wanpela kantri.

Mi no bin luksave long sampela samting i kamap tude, tasol mi amamas long developmen we mipela i kamapim we i mekim mipela i kamap olsem wanpela kantri. Mipela i mas stap strong na amamas long planti ol wok developmen i kamap.

Planti i save ting olsem wok bilong stiaim kantri em wanpela isi wok. Mi ken tok olsem sapos i no bin gat ol nupela wok kamap long teknoloji na globalaisesen long wol, i gat planti ol arapela salens mipela gavman i save bungim.

Planti bilong mipela i save lus tingting long hatwok bilong ol bikpela maunten, ol baret na ol planti longwe ailan na ol ples tais i stap long kantri bilong yumi.

Em i tru olsem Gailala i no stap longwe long bik-taun bilong yumi Pot Mosbi. Tasol long wokim wanpela rot na lukautim, em kos bilong en i antap tru, na tu i gat ol narapela nid em mipela i mas lukluk long en long wankain taim tu long ol narapela ples insait long kantri bilong yumi.

Mipela i no save tingim olsem ol bus na maunten, bikpela wara na ol narapela samting long ples bilong yumi i save i save givim hevi long sait bilong trenspot na komyunikesen.

Dispela em samting tru olgeta gavman i save bungim taim ol i laik bringim developmen na ol sevis i go long olgeta kona bilong PNG.

Planti ol lain husat i save tok daunim mipela i kam long ol ples i nogat ol bikpela maunten, bikpela wara na kain ples olsem mipela. Planti ol pipel bilong ol i save stap tasol long taun na siti na ol rot na bris bilong ol i sanap moa long handret yia i go pinis.

Sampela bilong ol dispela lain kantri i save yusim ol liklik pikinini olsem wok leba long bringim indastri na bisnis long kantri bilong ol. Sampela bilong ol i yusim ol sleiv o wokmanmeri nating long wokim kamapim kantri na wok agrikalsa bilong ol tu i no bihainim ol strongpela lo i stap bosim wok agrikalsa tude.

Ol lo i wok long senis nau na olsem wanpela developing kantri, mipela i mas go het na kamapim moa gutpela wok insait long mak mipela yet i givim.

Sampela bai hariap long haitim ol dispela samting olsem giaman toktok nating. Tasol histori i soim klia pinis long rekot.

Hia long PNG, mipela i lukluk moa long ol salens long bringim gutpela sevis i go long ol pipel. Long ol yia i go pinis planti ol wok plen i bin kamap.

Pipel bilong Papua Niugini, mi bai no inap stop inap mipela i mekim olgeta samting stret.

I no long taim i go pinis long Janveri long las yia, NEC i kamapim gen wanpela Nesenel Plening Komiti we i lukluk long kamapim wanpela bikpela Nesenel Stratejik Plen we i ken muvim dispela kantri i go het insait long narapela 40 yia i kam.

Dispela komiti i kamap wantaim tingting olsem dispela 8 Poin Plen bilong 1972 i orait yet, tasol sapos mipela i laik go het, mipela i mas muv long stretpela rot long mekim bisnis insait long dispela kantri.

Olsem na, long las yia long Septemba, Nesenel Lidas Samit (Bung) i kamap wantaim tingting olsem sapos Nesenel Stratejik Plen i kamapim wok, i mas gat moa wok i kamap long sait bilong politikal sistem na rot bilong bringim ol sevis.

I gat 6-pela bikpela eria i stap insait long Nesenel Stratejik Plen.

1. Stratejik Plening;
2. Strongim na sanapim Institusenal sistem;
3. Human Developmen na Strongim Pipel;
4. Kamapim mani
5. Sekyuriti na Intanesenal Rilesens; na
6. Klaimet Senis na Strongim go het bilong Bus Graun.

Dokta Kavanamur na ol tas fos memba bilong em i bin tok hat tru long redim dispela plen long mekim wok.

Mi lain lusim dispela opis wantaim gutpela tingting olsem PNG i bihainim gutpela rot.

Tasol taim gavman i wok long strongim politikal na pablik sevis wok bilong en long bringim gutpela sevis i go long ol pipel, mi askim ol pipel bilong Papua Niugini long dispela 34th anivesari bilong Indipendens long givim moa taim bilong ol long sevim kantri bilong yumi.

Planti ol developmen insait long kantri i wok long bungim hevi bikos long planti toktok long sait bilong kompensesen i kamap. Ol skul na etpos we i kos planti milien Kina long gavman i kamapim em ol man i kukim daun na komyuniti i no lukautim gut.

Tasol ol pipel i askim yet gavman long wokim gen ol dispela samting hariap tru.

Taim ol provinsal edministresin i paia, em i givim hevi gen long gavman bikos dispela mani long wokim gen bilding em gavman i ken putim long karimaut narapela wok developmen.

Taim ol hevi i kamap long sait bilong ren, graun bruk, ol giaman lain i save yusim dispela long kisim mani long rot na tu putim ol giaman kleim long wanem samting em God i kamapim. Dispela em wanpela rabis pasin tru na mipela i go het yet long mekim.

Moa long en, mipela i holim pas 'rait' bilong mipela long demokrasi tasol mipela i lus tingting long ol 'wok bilong mipela' we i kam wantaim dispela rait. Yumi soim wanem ol wok yumi mekim wantaim eksen bilong yumi bihain long 34-yia?

Bagarapim ol pablik samting i save givim hevi long gavman. Ol nupela infrastraksa we i ken stap narapela 20 yia i save senis klostu klostu. Ol dispela kain samting em strit lait, sola panel na ol rop waia bilong komyunikesen lain.

Em isi long sutim pinga long ol narapela, tasol wanem samting tru yu mekim long bringim kamap gut kantri bilong yu? Wanem samting tru yu mekim long bipo na wanem plen yu gat long mekim long tumora?

Wankain tu, mipela save askim long developmen long ol rurel eria bilong mipela. Gavman i luksave long dispela na i bringim ol ovasis lain o investa i kam long kamapim ol indastri insait long ol ples we wok gaden em wanpela rot tasol long kisim mani.

Tasol hatwok bilong gavman long kamapim ol fektori na bringim nupela mani o foren eksens i bungim hevi taim ol giaman lain i kamapim wantaim ol lain kain rot bilong ol yet long kisim mani.

Mipela i save toktok tumas olsem pe bilong ol lain long rurel eria i daunbilo na nogat gutpela rot long painim mani long stat wantaim. I mas gat wanpela i stap namel we i gat gutpela tingting i stap.

Dispela i bringim mi kam long hevi bilong nogat wok long ol rurel eria. Wok gaden o sabsistens faming em planti mas noken ting olsem em i no wok tru. Sampela ol kain kakao na oil pam fama i save kisim namel long K3,000 insait long wan wan mun na moa. Dispela mani i antap moa long potnait pe bilong sampela ol opis wokmanmeri.

Long makim 34th anivesari bilong yumi, noken larim ol kain kain toktok i paulim tingting bilong mipela olsem mipela i go het yet long groim ekonomi bilong mipela na ol rurel pipel bilong mipela i helpim ol long kamapim dispela groa.

Gavman i lukluk long developim tupela nupela LNG projek we bai bringim bikpela developmen tru insait long komyuniti na ekonomi bilong yumi. Mipela i mas kirap na sanap long bungim dispela ol salens wantaim gutpela tingting. Mipela mas redi long luksave olsem mipela i no ken stop long go het.

Moa long en, gavman i stat sampela yia i go pinis long pait long givim luksave i go long ol papa bilong risos long toktok bilong klaimet senis. Mipela i kisim bikpela luksave pinis olsem wanpela liklik o developing kantri we i kamap wantaim ol gutpela tingting. Mipela i no putim han i go aut long mani.

Em tru olsem mipela i kam longpela rot pinis na mipela mas redi long ol go het yet.

Olsem na long makim dispela anivesari, mi laik tok tenkyu long ol pipel insait long kantri long wan wan sapot na wok yu mekim insait long dispela longpela rot we planti salens i stap long en na mipela i go het yet.

Mi tingim tu ol papa bilong yumi long bipo, husat i wok olsem ol medikal wokman, ol leba man, ol katekis, ol tisa, polisman, ol soldia, luluai na tultul na ol wokman husat i wok hat long redim rot bilong planti bilong mipela.

Mi tenkyu tu long ol wokman meri long taun husat i save sevim ol pablik. Planti bilong ol i save wokabaut tasol nogat luksave i save go long ol.

Mi luksave tu long ol helt woka husat i wok insait long dispela taim bilong Indipendens De wantaim ol pipel bilong Morobe, husat i kisim bagarap long sik nogut kolera.

Ol helt atoriti i wok hat tru long daunim dispela sik long go bikpela.

Long pinisim tok, Pipel bilong Papua Niugini, mi askim yupela long wok bung wantaim na wok strong long mekim dispela kantri bilong yumi i kamap kantri we ol pikinini bilong yumi i ken amamas long en long tumora.

Hepi 34th Anivesari bilong Kantri na Independens.

**M. T. SOMARE GCL GCMG CH CF KStJ
Pram Minista**

Wanem tingting bilong yu long Indipendens?

PLANTI manmeri long Papua Niugini (PNG), i save i gat wanwan ol tingting bilong ol yet long as bilong Indipendens. Sampela i tingim kantri bilong yumi i kisim independens long Septemba 16, 1975 taim kantri bilong yumi i bruk lusim Australia long sanap em yet olsem politikel independens bilong yumi. Hia Wantok Niuspepa ripota, **JAMES KILA**, i kisim tingting bilong sampela manmeri long wanem samting tru em as bilong independens?



JACK METEKA bilong Lufa long Isten Hailans provins em wanpela man husat i save stap long 9-mail setelmen long Mosbi. Em i yusim independens de long salim ol

fleg long makim mani long selebresen bilong dispela bikipela de.

Jack i tok olsem, em i save go baim ol dispela fleg long ol stua na bihain em i save karim raun long rot na salim.

Dispela independens de i givim em sans long salim ol PNG fleg na kep long kisim liklik mani long helpim sindaun bilong em.

Em i tok olsem em i amamas olsem PNG i kisim independens na ol manmeri i ken mekim disisen na bisnis long laik bilong ol yet.



PETER HOAKA, bilong ples Siviri long Tairuma long Galp provins, i bin bilas gut tru long tumbuna bilas bilong em stret na i

bin go long opis bilong em long SMEC Enjiniaring long long Mosbi taim Wantok i bungim em. Peter i tok em i amamas na bilas na go long wok long a m a m a s i m namba 34 Indipendens De bilong PNG, long wanem "PNG em nau fri na i ken mekim disisen bilong em yet olsem wanpela kantri."



REBECCA PETER wantaim **ROSE GAMENDO** i bin salim ol naispela PNG fleg na kep raun raun long Waigani long bringim amamas na tu gutpela spirit bilong Indipendens long ol manmeri bilong Mosbi na PNG. Tupela i karim ol naispela fleg na tu ol kep we i gat ol kala bilong PNG em ret, blek na yelo na dispela i kamap nais tru long bikipela san. Tupela i tok independens em taim bilong amamas long wanem "PNG em kantri bilong yumi na yumi i mas amamas oltaim long en."

NCD Gavana Parkop tok PNG bai no inap stap olsem sapos nogat independens


JAMES KILA i raitim

GAVANA bilong Nesinol Kapitol Distrik (NCD), Powes Parkop i tok olsem independens em bikipela samting tru insait long histori bilong Papua Niugini.

Olsem na ol pipel long kantri i mas soim sampela kain luksave o rispekt igo long independens em kantri bilong yumi i kisim long 1975.

Mista Parkop i tok olsem em i tru olsem planti pipel bai tok tok olsem i gat planti ol kain kain hevi i kamap bihain long PNG i kisim independens. Tasol em i tok olsem sapos ol pipel i glasim gut, ol bai luksave olsem PNG nau i sanap long em yet long mekim disisen long pipel bilong kantri na ol risoses bilong en.

Mista Parkop i bin givim dispela toktok long Mande insait long wanpela bung wantaim ol nius-lain long Lakatoi Haus



NCD Gavana Powes Parkop

long Mosbi long tokaut long program bilong 34th Independens selebresin insait long NCD.

Em i tok olsem PNG ino inap kam kamap olsem long nau sapos em ino bin kisim politikol independens

Em i tok olsem planti ol kantri insait long wol husat i stap aninit long lukaut bilong ol narapela kantri i wok long bungim hevi. Dispela em bikos ol ino inap long mekim ol di-

sisen bilong ol yet na planti tai mol pipel bilong ol i save pait namel long gavman bilong kantri husat i lukautim ol na planti manmeri i save dai na tu planti ol bagarap i save kamap long ples bilong ol.

Mita Parkop i tok olsem dispela taim nau long 34th Independens em taim bilong amamas namel long yumi ol pipel bilong Papua Niugini husat i stap insait long Mosbi siti em kapitol siti bilong kantri.

Long dispela yia planti ol gutpela na kain kain program i kamap insait long NCD long amamasim ol manmeri husat i stap insait long siti.

Long aste i lukim ol sumatin i mas stat long Waigani Draiv igo insait long Se John Guise Stadium. Long stadium tu i lukim ol lain musik atis bilong CHM Supasaun ben i pilai long amamasim ol manmeri.

Gavana Parkop i tokaut tu olsem long dispela yia NCDC i bin helpim ol komiti bilong Hiri

Moale Festival wantaim K500,000 long redim ol program na festival bilong dispela yia.

Mista Parkop i tok olsem NCDC i luksave ol pipel bilong Motu Koita, husat i givim graun bilong ol long Mosbi siti i kamap na long gutpela pasin NCDC i givim helpim igo long ol long ol i ken amamasim kastom na pasin tumbuna bilong ol.

Planti ol gutpela selebresins bilong Hiri Moale Festival i bin kamap long Se Hubert Murray Stadium na tu long Ela Bis we i lukim ol lagatoi kanu i kam sua long nambis na planti old anis na singsing i bin kamap long dispela taim.

Ol manmeri i bin amamas long lukim Hiri Hanenamo Kwin kontes i bin kamap na kain kain ol bilas na danis na tu kala bilong dispela Hiri Moale Festival i bin kamap paia lait stret.

DANIEL DIX, husat i

save stap long Wewak long Is Sepik provins, i tok olsem Indipendens em taim bilong amamas olsem PNG i kamap olsem fri kantri long mekim disisen bilong em yet. Em i tok olsem ol manmeri i mas amamas long wanem PNG i kisim independens isi tasol na nogat blut i kapsait o nogat man i dai long pait long winim dispela independens. Em i tok gen olsem taim ol narapela kantri long



wol tude i wok long pait hat yet long kisim independens, PNG em i laki tru na dispela em wanpela bikipela samting ol manmeri i mas amamas long en.



olsem Biwat. Nem bilong dispela meri **SERAH ANTON** i tok olsem ol manmeri long ples bilong em i stap yet olsem bipo ol tumbuna bilong ol i save stap na i no lukim ol sevis bilong gavman i go long ol bihain long 34 yia. Em i tok em wantaim ol meri bilong ples i

Wanpela strongpela yangpela meri bilong ples Biwat long hap bilong wara Yuat long Is Sepik provins i bilong em long ol ples

save yusim yet ol bet ol i wokim long diwai na wokim raft na karim ol kaikai bihainim Wara Sepik i go daun na salim.



JAMES WARAGURE, bilong Lufa i tok em amamas long kam stap long Mosbi na mekim bisnis long sapotim em yet. Na independens em gutpela long wanem taim PNG i sanap long em yet olsem independen kantri, ol manmeri i ken mekim wok bisnis long laik bilong ol yet na sapotim sindaun bilong ol yet.



BAI KAM KLOSTU!!
RH Hyper Mart bai opim Vision City long Waigani. Hia em wanpela flout bilong ol na ol wok manmeri bilong ol i sanap antap na amamas long independens de.
Foto: Nicky Bernard



ANGORAM AMAMAS: Mamba bilong Angoram na IPBC Minista i kisim invetesen long amamas wantaim ol pipel long Angoram. Poto: James Kila

Wara Sepik kalsarel festival paia lait long indipendens selebresen

JAMES KILA i raitim

OL MANMERI long Angoram distrik long Is Sepik provins, i statim indipendens selebresen bilong ol wantaim Wara Sepik Kalsarel Daivesiti Festival. Dispela festival stat long aste Trinde, Septemba 16.

Moa long 20 tumbuna singsing grup long ol ples long Angoram distrik long hap bilong Wara Sepik olsem Marienbeg, Angoram, Keram, Yuat na Karawari, i bin stap insait long dispela festival.

Praim minista Gren Sif Se Michael Somare, wantaim Mamba bilong Angoram na Minista bilong IPBC, Arthur Somare, i bin

long stap insait long dispela seremoni.

Wanpela kastom seremoni we i lukim ol lain i katim skin bilong ol yangpela man long soim olsem ol i kamap bikpela man long sait bilong kastom bai kamap long ples Timbunke.

Dispela ol program bilong festival bai lukim tu ol yangpela manmeri i stap insait long ol string-ben resis na tu ol lokel tieta grup i pilai na tu bai i gat kanu resis long Wara Sepik.

Dispela Wara Sepik Kalsarel Festival bai lukim tu ol manmeri i soim ol lain turis long sampela kain kastom bilong paitim saksak na tu soim sampela ol wok bilong mekim kaving long ol diwai. Ol narapela samting bai kamap tu bai lukim ol

manmeri i soim ol tumbuna pasin bilong mekim pot wantaim graun na tu soim ol kain kain ol plawa na ol samting i gro gut long hap bilong ol long Wara Sepik.

Ol lain husat i go pas long festival i tokaut olsem turisim indastri long Is Sepik em mani mak bilong en i sanap olsem K1.2 milion we indastri i save kisim long wanwan yia. Tasol i gat gutpela sans yet long lukim dispela mani mak i go antap long K10 milion.

Narapela samting tu em kamap bilong ol Sepik Riva Turis Opereta Asosesin (SRTOA) husat i wokbung wantaim ol lain husat i gat wankain laik i ken helpim long strongim wok bilong turis na developmen long provins.

Gavana Parkop ino amamas long ol gavman dipatmen

NESINOL Kapitol Distrik Gavana, Powes Parkop i tokaut olsem em ino amamas tumas long kain pasin ol lain nesinol gavman dipatmen i mekim long ino givim sapot long Independens De.

Mista Parkop i bin mekim dispela toktok taim em i bin toktok wantaim ol nius lain long dispela wik.

Em i tok ol gavman dipatmen i sapos long go pas long wok bung long givim sapot long amamasim Independens De, tasol planti ino mekim dispela.

Mista Parkop i givim tok amamas bilong en igo long ol bisnis haus long Mosbi siti husat i givim sapot na helpim long mekim 34th Independens Anivesari long Mosbi i kamap gut tru.

Em i tok amamas long ol koporet kampani, husat i putim mani na tu amamas long stap insait long selebresin bilong makim 34th PNG Independens anivesari.

Em i tok amamas long Chin H Meen long putim ben konset bilong en we ol pipel i ken go raun na lukim ol fevered musik atis bilong ol i pilai long stes long Se John Guise Stadium.

Long disopela yia tu em SP Breweri i amamas gen long stap wantaim ol kalsa na pasin tumbuna insait long Nesinol Kapitol Distrik long Hiri Moale Festival

Dispela em toktok SP Breweri Human Risos Menesa, Jerry Atahu i bin givim taim em i givim K50,000 igo long ol Hiri Moale Festival Ogenaising Komiti long Mosbi.

Dispela asosesin o wok-bung wantaim namel long SP Breweri na Hiri Moale Festival we i save selebretim Hiri Treid namel long ol lain pipel bilong Motu Koitabu na ol lain bilong Galp provins moa long 100-yia bipo. Na dispela sponasip bilong ol long dispela yia em namba 13 sponsa SP Breweri i givim .

“Ol lain pasin bilong singsing na amamas olsem Hiri Moale i mas mekim mipela long stop na amamas na tu luksave long ol pasin kalsa na tumbuna pasin bilong yumi insait long ol tumbuna singsing na ol singsing lotu (peroveta),” Mista Atahu i tok.

“Mi tok amamas long ol narapela ol sponsa husat i givim helpim long dispela yia long sapotim festival insait long Nesinol

Kapitol Distrik na mi bilip yupela i ken stap wantaim mipela long amamas insait long dispela festival neks wik,” em i tok.

Insait long dispeal yia 2009 SP Brewery i putim han igo antap long sapotim tu Enga Kalsarel So (em ol i muvim igo long 2010) na tu Goroka

Kalsarel So we bai kamap long dispela wiken.

Hiri Moale Festival i bin i kamap long Septemba 14 igo 16 long Mosbi.



DANIS: Meri Lealea i soim stail bilong em long namba 2 de bilong Hiri Moale resis long Ela nambis long Mosbi. Poto: Andrew Molen

Graun Blo Mi!

Husat i stap Yurop, Esia o Afrika Lo Pasifik, Australia, Amerika Graun blo yu na tumbuna blo yu Makim bikpla de mi singautim yu

Lo sankamap na long sandaun Kirap sanap, maski sindaun Paitpaitim ol das lo as blo yu Na hamamasim kantri blo yu

Yu bengim kundu na gar'mut yu paitim Autim ol bilas na smel sanda yu haitim Putim ol kangal na gris pik lo skin Makmakim ol pes na welim ol skin

Kala blo graun yu putim lo kar Yelopla kumul na waitpla sta Putim graun blo yu lo lewa blo yu Na pipol blo yu lo tingting blo yu

Rausim aiwara na blekpla klos Lustingim ol wari na kinkain kros Tok sori lo brata na susa tu Long wanem, yumi wan femli tru

Nau em taim blo hamamas Nau em taim blo komim gras Nau yu sanap stret na apim het Nau yu paitim bros yu sanap yu yet

- Scott Waide i raitim



**ELECTORAL
COMMISSION**
Papua New Guinea



TOK AMAMAS BILONG INDIPENDENS

ILEKTOREL KOMISINA ANDREW S. TRAWEN NA OL
WOKMANMERI BILONG PNG ILEKTOREL KOMISIN I
KISIM DISPELA TAIM LONG TOK AMAMAS LONG
PAPUA NIUGINI LONG
34TH INDIPENDENS ANIVESARI BILONG EN...



**HEPI 34TH
ANIVESARI
PAPUA NIUGINI**



NA TU LONG PIPEL BILONG PAPUA NIUGINI....VOT BILONG
YUPELA EM I PAWA. TASOL LONG SOIM RAIT BILONG
YUPELA LONG VOT INSAIT LONG OL ILEKSEN, NAMBA WAN
SAMTING TRU EM YU MAS PUTIM NEM BILONG YU INSAIT
LONG ILEKTROL ROL.
TINGIM GUT....WANPELA MAN, WANPELA VOT!

TOK-ORAIT I KAM LONG:

ANDREW TRAWEN

ILEKTOROL KOMISINA





MASIN NA TUMBUNA

PASIN: Ol wokmeri bilong Abel Komputing long Waigani i luk stail stret wantaim nais-pela tumbuna bilas bilong ol long so-rum bilong ol. Poto: Nicky Bernard.

TUPELA TINGIM KALSA: Tupela stail mangi bilong SMEC Enjiniaring i bilas long stail bilong Tairuma long Galp provins na go long wok ples. Poto: James Kila

Ol wokman meri go wok wantaim tumbuna bilas

James Kila i raitim

PASIN bilong amamas na soim olsem yu trupela man o meri bilong Papua Niugini stret em taim yu stap insait long tumbuna bilas bilong yu stret.

Taim yu stap insait long tumbuna bilas, em filings bilong yu bai narakain na bai yu soim stret olsem yu bilong wan ples, o kalsa insait long dispela kantri we i gat moa long 830 tokples olgeta. Tasol em i stap strong yet olsem 'Wanpela Nesen, Wanpela Pipel na Wanpela Kantri'

Long Mosbi planti ol kampani i bin amamas taim ol i larim ol wokmanmeri bilong ol i bilas long tumbuna bilas long eria bilong ol stret na go wok na sevim ol kastoma bilong ol.

Wanpela bilong ol dispela kampani em Abel Computing long Waigani, we long Tunde i lukim ol wokmeri bilong en i bilas nais tru long tumbuna bilas we i bihainim kalsa bilong ol stret. Planti lain stret i amamas tru long lukim ol naispela kala bilong bikos na kangal bilong kumul na ol pisin i mekim nais na welkam long ol kastoma long Abel Komputing opis long Waigani.

Narapela ol opis lain tu i soim ol kalsa bilong ol na bilas long tumbuna stret na go long wokples long Tunde. Wanpela bilong ol dispela lain em ol wokman bilong SMEC Enjiniaring long Waigani.

Wanpela wokman bilong SMEC Enjiniaring i stori long Wantok Niuspepa olsem em i amamas tru long stap long tumbuna bilas bilong em bikos indipendens em taim bilong amamas na soim tru olsem "Yumi bilong PNG stret" na yumi mas amamas olsem Papa God i givim gutpela kantri bilong yumi em nau yumi stap long en.

"Yumi mas amamas olsem nogat narapela kantri i bosim mipela. Mipela i stap fri na mipela i ken mekim disisen bilong mipela yet long lukautim sindaun bilong mipela yet,"

Planti ol skul pikinini i bin bilas bihainim ples we ol i kam long en na sampela tu putim ol siot na laplap we i gat kala bilong PNG fleg i stap long en na go long skul.

Dispela indipendens five o taim bilong soim amamas i soim tru olsem PNG em kantri bilong yumi, maski yumi bilong kain kain tokples o bilong narapela liklik viles o hauslain, yumi ken stap olsem 'Wanpela Nesen, Wanpela Kantri na Wanpela Pipel'.

"TRY!"

X'cess Fixed Wireless Phone NOW in PORT MORESBY, LAE, MADANG, KOKOPO AND.....

ALOTAU

only K55

. gst inclusive

Kevin Prior "Mangi Morobe". Try Taim Telikom PNG Kumuls

Prepaid service only.

no waiting, no cable worries, portable and convenient, ...just connect.

Another new Innovation from Telikom PNG.



AMAMAS: Ol atis husat i greduet wantaim save bilong lukautim na groim mani.

Noken stap kalabus oltaim long laip

Paul Zuvani i raitim

OL MANMEREI i mas noken mekim samting we i kalabusim ol oltaim long laip.

Ol i mas mekim samting we taim bihain i lukautim ol gen.

Dispela em tok bilong Paulus Boga, trena bilong 14 atis (manmeri bilong dro) husat i greduet wataim save bilong plenim mani bihain long 9-pela de trening ol i kisim long Musium na At Galari Haus long Waigaini long las wik Fonde, 10 Septemba, 2009.

Long taim bilong givim setifiket long ol dispela sumatin, Mista Boga i tok ol atis i wankain olsem manmeri i karim pikinini na lukautim wantaim save olsem long taim bihain pikinini bai bikpela i lukautim ol.

"Dispela i mas wankain long wanem liklik wok bisnis yu ronim.

"Long helpim yu i gat inap strong na stap wantaim bel isi long laip, yu i mas mekim samting i gat mining.

"Mining olsem yu no yusim olgeta taim na strong long wok tasol.

"Sapos i gat mining dispela samting i mas sampela taim sampela taim long laip i tanim na lukautim yu gen," Boga i tok.

Em i tok planti taim ol manmeri i save yusim olgeta taim long wok tasol.

Na long ronim liklik samting olsem salim buai, gaden kaikai na bilum o ol dro olsem ol atis i mekim i ken helpim ol long bihain taim sapos ol i plenim gut mani.

"Yu mas i gat mani plen long save hamas mani yu bai yusim na hamas mani yu bai sevim.

"Wankain olsem pikinini papamama i karim na lukautim i stap liklik na i gro bikpela na bihain kisim strong na helpim ol.

"Dispela kain tingting tu i mas stap wantaim yupela taim yupela i ronim wanem kain bisnis yupela i mekim long em."

"Yupela i mas gat driman long laip na karimaut dispela driman," Boga i tok.

Long bekim Gazallah Bruder husat i makim maus bilong ol greduen i tok ol i amamas long samting ol i lainim long woksop.

Em i tok planti taim em i save

mekim samting tasol i nogat tingting bilong sevim mani bilong helpim long bihain taim.

Tasol wantaim save em na ol wan sumatin bilong em i kisim i bilip olsem dispela bai helpim em long taim bihain.

Em i tok tenk yu na bilip olsem samting ol i lainim ol bai yusim taim ol i go bek long ples bilong ol.

Kamap na givim toktok dispela taim tu em Gabriel Iso bilong Ginigoada Bisnis Developmen Faundesen (GBDF), Gure Huk bilong Maikro Fainens, Peter Piawu bilong Smol Bisnis Koporesen na Mrs Marble Gavera.

Komyuniti Developmen Minista Dem Carol Kidu na David Conn, bod siaman bilong GBDF i no kamap.

Dispela woksop em GBDF i kamapim wantaim sapot bilong mani i kam long Jemani Developmen Faundesen Ejensi long Jemani na PNG Maikrofainens i helpim wantaim trening pesenel.

Bisnis i mas kamapim kaikai

LONG lukim bisnis i stap strong na go het long wok, em i mas mekim win mani.

Dispela em olsem wanem samting em i gat long plen i mas karim kaikai. Sapos nogat papa o mama bilong bisnis i save bisnis bai bruk.

Martyn Dawson, jenerel menesa long automotive divisin bilong WR Carpenter (PNG) i mekim dispela toktok long opim bilong nupela woksop bilong kampani long Boroko Motos, Mosbi, long Trinde 9 Septemba, 2009.

Em i tok i gat ol arapela samting i stap bilong strongim wok bisnis tu.

Dispela em mekim ol samting we i strongim bilip bilong ol manmeri long kampani.

Em i tok tu olsem kampani i mekim samting we i bihainim laik na tingting bilong ol kastoma.

Moa yet i mas

strongim ol wokman wantaim sampela ol gutpela samting long holim ol i stap yet long kampani.

"Kampani i mas kamapim sampela samting long soim olsem em i lida na olsem em i mekim bris o wokim poroman pasin namel long ol kastoma na wokman bilong kampani.

"Long Boroko Motos olsem lida bilong kastoma bilong mipela em bai bringim kain prodak ol i laikim na givim bilip long en.

"Long dispela as mipela i kamapim sampela senis long givim dispela luksave," Dawson i tok.

Dispela ol samting em:

- **OLGETA** askim bilong ol kastoma em kampani i laik long bekims insait long 24 aua tasol;
- **LIDA** bilong mipela i gat atoriti long givim oda long kain sevis ol i mas givim

long ol kastoma;

- **LIDA** bilong mipela i ken luksave long laik bilong ol kastoma bipo long ol kastoma i askim long em (em long databes maketing na menesmen long In f o m e s e n Teknoloji (IT).

"Long makim maus bilong ol dairekta mi tok tenk yu husat manmeri i kamap long dispela taim bilong opim bilong nupela woksop."

"Mipela i kisim dispela taim long givim luksave long Pasifik Straktsa na Tony Santiago bilong WR Carpenters long ol i wokim woksop na olgeta wokman husat wantaim sapot bilong ol i lukim dispela driman i kamap tru tru," Dawson i tok.

Wantaim opim bilong nupela woksop kampani i kisim dispela taim tu long lonsim nupela E-Klas long Mercedes-Benz ka.

Bikpela mani man inves long Yandera kopa

Paul Zuvani i raitim

WANPELA bikpela mani man bilong Amerika i baim sea long Marengo, yangpela Australia eksplorasen kampani long divelopim Yandera kopa na molibdenum projek long Bundi, Madang Provins.

Dispela bilienea em George Soros bilong Soros Grup kampani husat i bai 20 pesen sea long Marengo long Septemba 3, 2009.

Long taim Soros i mekim olsem sea mak bilong Marengo long Australia Stok Eksensis i kalapim planti maining kampani long las wik Fraide na nau i stap antap olgeta wantaim 21 Australia sens.

Invesmen bilong Soros i kamap long taim menesing dairekta bilong Marengo Les Emery i wok hat long painim mani long mekim wok.

Na Emery i lukim dispela invesmen olsem bikpela sapot bilong tingting bilong divelopim main.

"Yes, kam bilong



MI LAIKIM: George Soros bilong Soros Grup bilong kampani.

Soros Grup aninit long Qantum Patnas i bikpela welkam long Bod bilong Marengo Maining."

"Bikos long kam bilong dispela grup i gat bikpela luksave long wol long projek bilong Marengo long Yandera."

"Dispela i givim tu luksave long Papua Niugini olsem wanpela kantri we i gat gutpela deposit bilong ol minarol."

"Em i bringim tu bilip long ol investa long Yandera Projek olsem long taim mipela i wok long redim ol samting bilong kamapim main," Mista Emery i tok.

Marengo Maining bai pinisim namba tu hap bilong Difinitiv Fisibiliti Stadi bilong em long pinis bilong 2010 na bai go insait long konstraksen long 2011.

Em i hop long salim namba wan kopa bilong em long 2013.

Planti man i lukim investmen bilong Soros olsem i wanpela mak we i soim Yandera kopa projek bihain bai kamap wanpela bikpela main long wol.

Na ol i gat bikpela amamas long dispela projek.

Soros i siaman bilong Soros Fan Menesmen, LLC na fauna bilong Open Sosaiti Institut.

Mama i karim George long Budapest long 1930. Em i abrusim hevi bilong Wol Woa 2 taim Nazi (Jemani ami) i raunim kantri na i ronawe i go long Ingran.

Bihain em i skul long London Skul bilong Ikonomiks na bihain i go long Amerika na kamap sitisen bilong Amerika.

Long dispela taim em i statim bisnis bilong em we i stap inap long dispela taim.

Em i wanpela man husat i helpim long daunim bipo Amerika presiden George Bush we i lukim Bush i pinis long wok politik.



KAM KISIM! Lonsing bilong nupela Mercedes-Benz ka long taim bilong opim bilong nupela woksop.



SIK I PASIM: Namba wan rot bilong ol manmeri long rot i pulapim bel nau i wok bungim hevi long ol strongpela sik olsem kolera na disentri. Dispela tupela sik em ol sik bilong pekpek wara, na i ken kilim ol manmeri isi tru. Ol kain ples olsem i save kukim kaikai long sait bilong rot, nau i wok kisim toksave olsem ol i mas pasim bisnis bilong ol. Kain kukim kaikai olsem na i nogat gutpela banis long ol lang i sindaun long en, o ol lain manmeri i save kuk i no wasim gut han i ken kamapim ol dispela kain sik pekpek wara nau i bagarapim kantri i stap. *Poto: Nicky Bernard*

1.02 bilion manmeri hangere

OL MANMERI long wol i kisim bikpela taim long hangere na insait long yia 2009, samting olsem 1.02 bilion manmeri i no kisim kaikai long olgeta de, wanpela

ripot we FAO i raitim long mun Jun long dispela yia i tok.

Dispela pasin bilong i go hangere i no kamap long i nogat kaikai long wol, tasol dispela hangere i kamap bihain long wol ikononik hevi (ris-esen), we ol liklik manmeri husait i save kisim liklik mani na bikpela namba bilong manmeri i no kisim wok, dispela ejensi bilong Yunaitet Nesen (UN) i tok

“Wol Ikononik slo daun na hai prais bilong kaikai long plan-ti kantri i bin pusim moa long 100 milien manmeri long igo hangere,” Dairekta

General bilong FAO Jacques Diouf i bin tok. “Hevi bilong Hangere i bin mekim na samting olsem wan sikst (1/6) bilong ol manmeri i kamapim bikpela birua long wol pis na sikuriti.

Dispela ol stori i bin stap long Didinet, wanpela on lain nius bilong NARI (National Agriculture Research Institute), we save givim sampela infomesen long sait bilong Agrikalsa.

Diouf i tok ol kantri we ino gutpela o stap rabis (poor country), mas kisim developmen, ikononik na polisi bilong wok long promotim Agrikalsa prodak-sen.

“Planti long ol lain husait i hangere em ol liklik fama long ol developping kantri. Tasol ol igat strong long planim kaikai na strongim sikuriti bilong

kaikai. Long strongim wok bilong ol, ol gav-man, wantaim sapa bilong intanesinol komyuniti mas wok bung wantaim long banisim wok bilong ol na ol tu i ken kisim sit na fetilaisa na tu, save o Teknologi, mani na maket long mekim wok bilong ol,” presiden bilong Intanesinol Fan bilong Agrikalsa Dvelopmen i tok.

Tasol igat sampela gutpela stori bipo long sait bilong hangere tu. long 1980s na hap bilong 1990s, hangere pasin ino bikpela tasol em i surik igo antap isi isi long las 10 yias, FAO i tok.

Dispela namba i surik igo antap namel long 1995-97 na 2004-06 long olgeta hap tasol ino long Latin Amerika na Caribbean. Tasol bihain, dispela ol kantri i rives o go bek taim ol prais bilong kaikai igo antap long taim bilong wok ikononik drop daun.

Dispela em wok bung bilong ikononik kraisis wantaim prais bilong kaikai igo antap tru na namba bilong ol lain hangere bai igo antap moa yet long samting olsem 11 pesen, Didinet i tok.

Long Asia na Pasifik, i gat tingting olsem 642 milion manmeri i kisim taim long bikpela hangere na long Sub-Sahara Afrika 265mil-ion, Latin Amerika na Caribbean 53 milion, klostu long Is na Not Afrika 42 milien na narapela ol develop kantri 15 milion olgeta.

Filipins helpim PNG long planim rais

WANPELA rais tim bilong Philippines i bin kam visitim Papua Niugini long luksave long wok bilong rais faming na wanem gutpela samting rais inap mekim long kantri. Dispela grup i bin go long Is Sepik na Madang provins long luksave long dispela.

Dispela ol opisol bai lukluk long strong bilong rais long dispela tupela provins na tu long kamapim wok bilong rais olsem bisnis na kamapim gutpela teknikal advais na trening long ol famas.

Ol saveman bilong rais long tupela kantri wantaim i paitim toktok (discussion) na kamapim wanpela memorandum ov andastending (MOU) long kamapim wanpela wok bung long kamapim rais faming olsem bisnis.

Olgeta i bungim tingting olsem dispela MOU bai kamap kwiktaim na tok orait long wanem, tupela kantri wantaim i ken toktok long strongim dispela wok bilong rais olsem faming.

Sekreteri bilong Agrikalsa Arthur Yap na Dairekta bilong Philippines Rais Risej Institut Ronilo Beronia, Dairekta of Bureau bilong Fiseris na Aquatic Risis Malcolm Srumento na narapela ol bikman bilong Nesenol Irigesen (Irrigation Administration na Intagreted (Intergrated) Pes Management(Pest Management).



TOKSAVE

Defens Fos Ritaiamen Benefit Fan Toksave na Wok Painimaut

Dia Ol Memba

Komreid Trasti Sevises LTD (CTSL) i wok long kamapim senis insait long Defens Fos Ritaiamen Benefit lo buk.

Long luksave olsem CTSL i kisim tingting bilong ol memba, husait em ol pensena na ol wokman bilong Defens tu, mipela laik tokaut olsem bai mipela holim ol bung long skulim ol pensena na wokman tu long ol kain kain makmak bilong ol wantain fan. Mipela long CTSL Member Services bai hamamas lo lukim yupla lo dispela ol bung.

Blhain taim bai mipela lukluk long holim ol dispela bung long highlands na ol narapela hap we mipela ino karamapim yet. Dispela bai kamap long 2010.

As tingting em:

Supaenuasen Wok Painimaut

Long kisim tingting bilong ol pensena na wokman bilong Defens, mipela bai hamamas sapos olgeta i kamap long ol dispela bung na pulumapim tu ol pepa long toksave long wanem kain ol senis yupela laik lukim kamap long fan bilong yupela.

Olsem mipela toksave pinis antap, bai mipela hamamas long lukim yupela long ol dispela bung. Sapos yumi wok bung wantaim bai yumi ken lukim senis ikamap long fan long halivim sindaun bilong yupla long behain taim.

Tamblo em ol ples we mipela makim long holim dispela ol bung.

Tenkyu
Siaman

Site	Deit	Ples bilong woksop - NCD tasol	Taim
Site 3	1 - 3/09/09	Goldie Barracks	10.00 am
Site 4	7 - 8/09/09	Basilisk	9.30 am
Site 5	10 - 11/09/09	ATS (air Squadron)	9.30 am
Site 6	De bilong ol Pensina 22/09/09	Mari Bareks (Ben Moide Klub)	10.00 am
Site	Deit	Ples bilong woksop - Ol narapela senta	Taim
Site 6B	Ol Pensina - 28/09/09	Igam Bareks -Lae (RSL)	10.00.am
Site 7B	Ol Pensina - 07/10/09	Moem Bareks (Wewak)	10.00.am
Site 8B	Ol Pensina - 14/10/09	Tarangau (Manus)	10.00.am
Site 10 B	Ol Pensina - 28/10/09	Vanimo Detasmen (W.S.P)	10.00.am
Site 11	Ol Pensina - 06/011/09	Kimbe (Liamo Resort, W.N.B.P)	9.00 am



SIMOK: OI PNGDF soldia i mekim simok long stat bilong ragbi yunion gren fainol gem bilong ol agensi m Harlequins long Mosbi las wik Sarere. Simok i karamapim ples na taim ples i kilia, tim i sanap pinis insait long fil. *POTO: Andrew Molen.*



LUSIM MI: Francis Sipa bilong Royals i strong long train na rausim tupela birua bilong em bilong Crushers long semi fainol bilong ol las wik long Lae. *POTO: Bustin Anzu.*



SEL: B gred kanu resis long Mosbi kamap long Tunde dispela wik we 24 kanu long olgeta nambis bilong Sentrol provins i kamap long en.



SEN: OI University Piggies pilai i holim ol yet olsem wanpela longpela sen na wokabaut i go insait long gren fainol gem bilong ol long B Gred divisen bilong Mosbi ragbi yunion resis agensim Harlequins las wik Sarere. *POTO: Andrew Molen.*

**POT MOSBI SOKA ASOSESIN
KOMPETISEN DRO
SARERE 19TH SEPTEMBER**

Telikom Pak - Bisini 1

TAIM	DIVISEN	FIXTURES	VS	
9:00	D4	MARINERS	VS	SAINTS
10:00	D2	GURIA	VS	PNG FIRE
11:00	D3	ATW SKY HAWKS	VS	PNG TIMBER
12:00	WP	TELKOM	VS	LAMANA
13:00	D4	MOROB UNITED	VS	NANIU
14:00	D1	LBC DEFENCE	VS	BAVAROKO

Telikom Pak - Bisini 2

TAIM	DIVISEN	FIXTURES	VS	
9:00	D2	QUANDO NEMBO	VS	SES UNITED
10:00	W1	SAINTS	VS	MUNKAS
11:00	WP	MUNKAS	VS	GURIA
12:30	WP	PNG GARDENER	VS	LBC DEFENCE
14:00	D1	HARD ROCKS	VS	TELKOM

SANDE 20TH SEPTEMBER 2009

Telikom Pak - Bisini 1


TAIM	DIVISIN	FIXTURES	VS	
8:00	D1	CSU THRILLERS	VS	BAVAROKO
9:00	Y2	LBC DEFENCE	VS	MANAMBU
10:00	D3	KUMUSI	VS	PJB WARRIORS
11:00	W1	ATW SKY HAWKS	VS	NNL MUSA UNITED
12:00	W1	MYGLES WANIMIX	VS	MANAMBU
13:00	D4	AONAI	VS	MANENA
14:00	W1	PNG FIRE	VS	MURAT
15:00	D2	DOBO WARRIORS	VS	PNG FIRE
16:00	D1	CSU THRILLERS	VS	KURTIANDRA

Telikom Pak - Bisini 2

TAIM	DIVISIN	FIXTURES	VS	
8:00	D1	NNL MUSA UNITED	VS	SES UNITED
9:00	Y2	BIWANO	VS	BINKU
10:00	D3	DBTI	VS	DOBO MURIKA
11:00	W1	A NATUNA	VS	RUBUANA
12:00	W1	MURIK UNITED	VS	KURTIANDRA
13:00	D4	MURAT	VS	BUCKS
14:00	W1	MANAMBU	VS	KELERUNA
15:00	D2	MOONBI	VS	MUIAH BROTHERS
16:00	D1	NNL MUSA UNITED	VS	GURIA

Teams on bye: Raitman (D2) ATWS Sky Hawks (Y2)

**bemobile
PAINIM BAL RESIS!**



Putim mak (X) long wanem hap yu ting bal i stap long en na salim i kam long:

**Bemobile
PAINIM BAL RESIS
WANTOK NIUSPEPA
P.O. Box 1982 Boroko,
NCD
Port Moresby.**

Bai yu gat sans long winim **sampela gutpela prais** i kam long Bemobile na **K100** i kam long Wantok Niuspepa long wanwan mun.

Lo bilong resis:
OI wokmanmeri bilong Wantok Niuspepa no inap pilai long dispela resis. Wantok Niuspepa tasol bai i makim wina. Nogat potokopi.
Taim bilong dro em bihain long foapela wik bai ol i droim wina na nupela pilai bai i stat gen. Nem bilong wina bai kamaut long pepa neks wik bihain long dro.

bemobile WANTOK

Nem:.....Krismas.....

Atres:.....

Phone namba:.....

Yu baim pepa long we?

Long strit/ rot/ stua:.....

Katim na salim i kam





bemobile Kap Nius

Rangers em liklik samting

Andrew Molen i raitim

BAFINUC I lai tok ol Bintangor Lahanis i bilip long winim fainols resis na ol i no wari long ol Masta Mak City Rangers.

“Wanpela tim tasol we mipela i gat tingting long was gut long ol insait long fainols em ol (Agmark) Gurias bilong wanem beks bilong ol i gat planti spit.

“Ol narapela tim olsem Rangers em nem bilong ol i no stap long pepa bilong mipela, mipela i bilip olsem mipela inap long rausim ol isi tasol i go long

sait,” I lai i tok.

Long laspela raun dispela wik, Lahanis bai bungim ATCL Bombers long Lae tasol tingting bilong ol i stap pinis long mekim gut long fainols resis.

Long wankain taim Rangers bai kisim Gurias long wanpela strongpela gem long Mosbi.

Rangers i lus long Toyota Mioks 30 – 14 long Wabag na Gurias i lus long Muruks 13 – 4 long Lae las wik.

“Fowet na beks bilong mipela inap long makim ol fowet na beks bilong ol arapela tim olsem

na mipela i bilip olsem mipela i ken ron gut long fainol,” I lai i tok.

Toktok bilong I lai bihainim gutpela win bilong ol agensim CIV-PAC NCDC Vipers 24 – 12 long Mosbi las wik.

Em i tok Vipers i bin winim ol long namba wan taim tupela i bung dispela yia na ol i hangre long bekim dispela dinou.

“Taim mipela i bin bung namba wan taim dispela yia mipela i putim 5-pela nupela pilaia long tim we mipela i kisim long kokol kompetisen long Goroka na

mipela i bin lus wansait.

“Nau mipela olgeta olupela pilaia i kam insait long tim long soim ol olsem mipela inap long winim ol stret,” I lai i tok.

Lahanis nau i stap long namba tri ples wantaim 17 poin, Guria long namba wan wantaim 20, Mioks namba tu wantaim 17, namba 4 ples em Rangers wantaim 16, Muruks long namba 5 ples wantaim 11 poin, Bombers i gat 9 poin, Vipers na Eagles long 7.

Dro bilong dispela wiken:
Wik 14 - Sept. 20. 3 kilok avinun.

SBS Muruks V Bintangor Eagles - Hagen

ACTL Bombers V Bintangor Lahanis - Lae

Agmark Gurias V MMC Rangers - Mosbi

CIVPAC Vipers V Toyota Mioks - Wabag



NOGAT WARI: Lahanis i no ting wanpela strongpela tim bai nap long stopim ol insait long fainols resis. **POTO:** Andrew Molen.

I lai wari long ragbi lig i no moa gutpela long ol liklik

Andrew Molen i raitim

BIPO Kumul hap bek, Bafinu I lai i wari olsem ragbi lig long Papua Niugini em i no gutpela bilong ol liklik mangi long pilai long em.

“Mi wari liklik long strong bilong gem,” em i tok las wik long Mosbi.

“Mi gat wanpela liklik pikinini man na mi no laik bai em i pilai ragbi lig.

“Mi save olsem mi pilai dispela gem na mi makim Kumuls na PNGNRL na mi save em tu bai laik bihainim mi, mi no nap stopim em tasol mi wari long gutpela bilong em na mi no laik em i pilai,” I lai i tok.

I lai marit long wanpela meri bilong Amerika (USA) na em i wari olsem ol arapela pilaia bai no inap isi long pikinini bilong em taim em i pilai.

Em i tok gem i strong long PNG tasol planti samting i no stret yet olsem na em bai amamas long pikinini bilong em i pilai dispela gem taim em i lukim olgeta menesmen na ron bilong gem i kamap gut stret.

“Pasin na tingting bilong pilai gem i no stret yet na mi no ting em i gutpela long pikinini bilong mi long pilai ragbi lig yet,” I lai i tok.

Em i tok tu olsem em yet i save traim hat long winim bek ples bilong em insait long Kumuls

tasol ol selekta i no luksave long em.

“Mi save traim hat olgeta taim tasol mi no save bai mi mekim wanem moa long winim lewa bilong ol selekta.

“Mi mekim olgeta samting pinis olsem na nau mi wokhat tasol long traim na winim wanpela spes long pilai ovasis,” I lai i tok. Las wik Sande em i wokhat gen long helpim Bintangor Lahanis long kapsaitim sip bilong ol CIVPAC NCDC Vipers 24 - 12 long Mosbi.

Lahanis i putim 5-pela trai kam long Walter Hasu, Garnet Auwo (tupela trai), Kevin Inagafa na Bernard Walok.

Vipers i bekim tripela trai wan-




WARI: I lai no laik bai pikinini bilong em i pilai ragbi lig. **POTO:** Andrew Molen.

bemobile Cup 2009



POTO: Andrew Molen / Wantok Niuspepa 1832.



"Kisim FRI K5 Prepaid kad long geit taim yu baim wanpela 'K10 Adult' tiket"

-PROFAIL-

De mama karim: Novemba 6, 1980.
 Longpela bilong em: 178cm.
 Hevi bilong em: 74kg.
 Provins: Simbu.
 Posisen: Hap bek.
 Fevret NRL pilaia: Andrew Johns.
 Fevret NRL tim: Newcastle Knights.
 Fevret PNG pilaia: Stanley Gene.
 Narapela spot yu save laikim: Soka. Mi bin pilai soka bipo mi kam long ragbi lig.
 Bikipela salens bilong yu: Long lukim pikinini bilong mi kamap na pilai ragbi.
 Astingting bilong yu long gem na laip: Long kamap gutpela pilaia na tu go pilai ovasis sapos mi gat sans.
 Liklik toktok bilong ol yangpela: Pilai long stail bilong yu, noken bihainim gem bilong pilaia long narapela tim.

bafinuc
ILAI

Bintangor
 Lahanis



Official Sponsors of the PNGNRL
 PO Box 1055 Waigani, NCD. Ph: 325 9400. Fax: 325 9428.

Penekovu em Hiri King bilong ol kanu

KANU bilong Alukuni long Sentral provins, Penekovu em Hiri King bilong B gred kanu resis long Mosbi.

Win bilong Penekovu i kamap long namba wan de bilong kanu resis long Mosbi long Tunde dispela wik.

Dispela kanu memba bilong Rigo, Ano Pala, i spit i kam long baksait long abrusim ol arapela husat i bing stap pas long en.

Penekovu i no bin statim gut resis tasol yangpela kepten bilong en,

Sepa 'Vinto' Gari bilong Elevela i mekim bikipela wok long daunim arapela 24 kanu insait long dispela resis.

Rinarau, kanu bilong Aroma i bin go pas wantaim GM Fonza bilong Tubuseria wantaim Sedikam bilong Nou Rage.

Ol i stap i klostu tasol win i pulap long sel bilong Penekovu na i salim em i kam long pinis mak pas long ol arapela.

Hailans zon makim U16 skwat

Sape Metta i raitim

HAILANS zon i makim pinis tim bilong ol long pilai insait long anda 16 ragbi lig zon resis we bai kamap long Kokopo, Is Nu Briten provins, dispela wiken.

Ol i bin winim dispela resis long 2008 na ol i makim 18 pilaia na 4-pela opisel long dispela skwat long traime na win gen.

Tim menesa, Ellyson Ketauwo, i tokaut long tim we ol i makim ol tim long ol pilai resis bilong ol skul mangi long Isten Hailans provins.

Em i tok olsem namel long ol dispela 18 pilaia em Arthur Layton na Samuel David husat

em ol olpela pilaia husat i bin stap long tim long 2008 tu we ol i bin win.

Skwat em; Suckling Toovey, Jobbie Katsie, Ambie Kolo, Aron Gizopo, Charlie Oliver, Bradock Aron, Nathan Millie, Sammy Soso, Tara Kevin, Alois Sabumei, Junior Haro, Hutaki Wartovo na Erick Francis. Intansen: Arthur Layton, Felix Tatsim Samuel David, John Anu na Bernard Goma.

Kosa em Tonnie Kewa, Sipa Osapae (asisten kosa), Gregory Maut (trena) na menesa em Ellyson Ketauwo.

Ketauwo i tok wok developmen na ronim bilong ol yangpela skul

mangi long ragbi lig em i no isi.

Long taim dispela skul boi ragbi lig developmen program i bin kamap inap nau, na bihain long 5-pela o 6-pela yia, mipela i no bin kisim luksave na sapot bilong provinsel gavman na tu ol bisnis, em i tok.

"Nau yet, mipela i laikim tru sapot bilong ol long kamapin strong wok bilong developmen we bai ken i go het long ol yangpela long provins," Ketauwo i tok.

Em i tok dispela ol yangpela pilaia bai makim taun, provins na kantri bilong ol long taim bihain na wok na sapot i mas kamap long strongim gem bilong ol nau.



TROFI: Ol sapota na memba bilong Penekovu i amamas bihain long win bilong ol.

Australia helpim netbol na basketbol

Andrew Molen i raitim

GAVMAN bilong Australia bai helpim Pot Mosbi Netbol Asosiesen (POMNA) na Basketbol Federesen bilong PNG (BFPNG) wantaim K50, 000.

Ol i givim dispela helpim aninit long Australian Sports Outreach Program (ASOP) program bilong Australia we i save lukluk long helpim ol spots divelopmen wok long ol komyuniti insait long PNG. Inap olsem K40, 000

bai go long POMNA long ronim wanpela bikipela trening kos bilong ol na tu mekim wanpela nupela ples bilong trening long Rita Flynn Netbol Kot.

BFPNG bai kisim K8, 8700 long ronim wanpela trening program bilong em bilong ol junia pilaia inap wanpela wik.

"Mi save amamas long lukim ol lokol spots olsem dispela ol husat i save strongim ol meri na yut long pilai, i kisim dispela mani long helpim ol gem bilong ol," Hai Komisina

bilong Australia long PNG, Chris Moraitis i tok.

Moraitis i kamap long Rita Flynn kot long Tunde dispela wik we em i givim helpim long dispela tupela spot.

Em i raun na lukluk tu long ples we POMNA i laik stretim long mekim ples bilong trening.

"Mipela i amamas long gavman bilong Australia long dispela kain helpim bilong ol i kam long mipela," Presiden bilong POMNA, Pole Kassman i tok.

U19 Garamuts amamasim PNG

I kam long baksait pes

Tasol ol Netherlands i no bin inap long paitim bal gut taim PNG i tro-moi bal long ol.

Olgeta bilong Netherlands i aut long 168 insait long 48.3 ova tasol.

PNG i stap namba tri bihain long ol i winim 7-pela gem na lusim tupela, Ireland i lusim wanpela gem na Afghanistan i wankain olsem PNG tasol ran ret bilong ol i antap olsem na ol i go namba tu na PNG i kam bihain long ol.



TITANS REDI LONG EELS: Ol pilaia bilong Gold Coast Titans, Preston Campbell (lephan) na William Zillman (raithan) i traime spit bilong ol long trening. Ol i redi long skelim strong bilong Parramatta Eels. Zillman i kam bek long Titans bihain long em i bin stap long saspensen. (Poto i kam long AAP Images)



BRONCOS SETIM PILAI: Ol Darren Lockyer na Peter Wallace, tupela ki man long Brisbane Broncos i go pas long ol lain tim met bilong ol long trening dispela wik. Ol bai bungim St George Illawarra Dragons long dispela wiken i kam. (Poto i kam long AAP Images)

Stadium em gutpela long soka

Andrew Molen i raitim

DISPELA nupela stadium we gavman i laik mekim em i gutpela long soka na arapela spots long Papua Niugini.

Dispela em tingting bilong Sif Eksekutiv Opisa bilong Telikom PNG, Peter Loko.

Telikom i save sponsaim planti ol bikipela spots tonamen na ol nesenel tim bilong PNG na ol i ting dispela stadium bai helpim tru spots long kantri.

"Sapos i gat ol gutpela ples na samting bilong pilai na trening gut bai yu lukim olsem level bilong spots tu i go antap.

"Mi tingting olsem dispela nupela stadium bai helpim tru long apim spots insait long kantri," Loko i tok.

Dispela stadium we ol i tingting long mekim long Konedobu insait long nesenel Kapitel Distrik (NCD) bai kos inap K20 milien.

Presiden bilong Osenia Futbol

Konfederesen (OFC), Raynald Temari'i tok ol bai putim narapela K10m long helpim PNG gavman i mekim dispela stadium.

Gavman i laik kamapim dispela stadium bilong holim 2015 Pasifik gems sapos PNG i winim vot long holim dispela gem na tu soim NRL long Australia olsem PNG i gat wanpela gutpela intanesenel pilai graun we sampela NRL gem i ken kamap long hap tu.

Temari'i tok bihain long dispela ol gem i pinis bai PNG Football Association (PNGFA) i go pas long ronim dispela stadium we ol soka gem bilong ol i ken kamap long hap.

"Nau yet mipela i nogat ples bilong pilai soka olsem na i nogat planti intanesenel soka pilai save kamap long PNG," Presiden bilong PNGFA, David Chung i tok.

Loko i tok soka, netbol, ragbi lig na planti ol arapela spot i save kisim gutpela

sapot bilong Telikom bilong wanem Telikom i bilip long spot olsem wanpela rot bilong helpim ol yangpela manmeri bilong PNG.

"Mipela i traim long sapotim spot bilong ol man na meri wantaim," em i tok.

Loko i tok Telikom i save lukluk long sapotim ol tim na spots long nesenel na intanesenel level tasol.

"Mipela i lusim sponsasip bilong ol klap na wanwan asosiesen long ol arapela sponsa," em i tok.

"Mi amamas long OFC long helpim gavman long mekim dispela stadium na mi ting em bai helpim soka na tu planti arapela spot insait long PNG," Loko i tok.

Em i tok ol i no save askim planti samting long ol etlit na ol spots ol i sponsaim.

"Mipela i laikim tasol bai ol i pilai long olgeta save na strong bilong ol na tu ol i mas amamas long gem bilong ol.

"Sapos ol ino amamas em bai ol ino inap win," Loko i tok.



DIVELOPMEN: Chung i tok NSL em gutpela resis long kamapim ol anda 20 pilaia. *Poto: Andrew Molen*

Royals winim ples long fainel

Bustin Anzu i raitim

MAINA primia, PNG Toner and Ink Supplies Royals, i winim namba wan ples long gren fainel bihain long 8-pela yia olgeta long Lae Ragbi Lig (LRL) resis.

Ol polisman i paulim driman bilong ol Wio Kim Kamkumung Crushers, husat i ol primia las yia, taim ol i winim ol 21-14.

Tupela tim i stap 10-10 na i gat 15 minit i stap yet na Royals hap bek, Michael Kelly, i kisim wanpela fil gol long putim ol i go pas long bagarapim sindaun bilong Crushers.

Royal kosa, Peter Kennedy, i amamas long ol mangi bilong em long wanem dispela em wanpela samting we ol i bin tingting long mekim long stat bilong sisen.

"Mipela i amamas long kam olsem, dispela em wanpela samting we mipela i bin stori long stat

bilong sisen na mipela i sambai tasol long bungim husat i kam antap," Kennedy i tok.

Em i tok ol i no pilai gut insait long namba wan hap long wanem ol i malolo longpela taim tru. Tasol ol i go bek long namba tu hap na kamapim strongpela banis na win.

Em i pilai bilong tupela tim wantaim long yusim het bilong

ol long wanem, skoa i bin sanap 10-10.

Tasol gem i tenis taim Kelly i kisim dispela kik we i go pairap long pos na i go insait long putim ol i go pas wantaim wanpela poin.

Dispela i strongim ol na ol i putim tupela moa trai.

Liklik stail winga, Kensity Komia, i skoa long kona na kisim ol i go antap 15-10.



RON LONG WIN: Fowet bilong Royals, Han Zika, i karim tupela Crushers pilaia wantaim na ron.

Poto: Bustin Anzu

Salens bilong Parakings

Andrew Molen i raitim

WANPELA tim long Nesenel Soka Lig (NSL) dispela sisen bai i gat ol anda 20 pilaia tasol.

Dispela tim em Besta Parakings bilong Lae, Morobe provins.

Paraking bai i gat bikipela salens tru long wanem ol anda 20 pilaia bai pilai agensim sampela ol nambawan pilaia long Papua Niugini (PNG) na Pasifik.

"Em i tru. Ol bai i gat bikipela salens tru. Tasol mipela i bilip em

bai strongim ol na bihain taim ol i pinis long anda 20 bai ol i kamap ol gutpela na strongpela soka pilaia bilong PNG," siaman bilong PNG Futbol Asosiesen (PNGFA), David Chung, i tok.

Em i tok PNG i laik putim wanpela tim bilong ol man long ol 2011 na 2015 Pasifik Gem, na dispela anda 20 tim em gutpela we bilong ol yangpela pilaia long redi long dispela ol gem.

"Taim 2011 i kamap bai ol i bikipela pinis. Ol bai i gat inap save na strong long sinia level na ol bai ken mekim gut long ol Pasifik Gem," Chung i tok.

Intanesenel Fud Koperesen (IFC) kampani husat i save mekim Besta tinpis i sponsa bilong Parakings long NSL.

Besta i soim sapot bilong en long ol Parakings wantaim K100,000 we ol i givim long PNGFA long Fonde, Septemba 3, dispela yia long Mosbi.

Tim i redi nau tasol ol i no makim ol pilaia yet.

Chung i tok ol bai raunim kantri na makim ol anda 20 pilaia na bai kisim ol i go stap na trening long soka akademi o skul bilong soka long Lae.

"Mipela bai amamas long stap wantaim ol Parakings inap tupela yia," sif eksekutiv opisa bilong IFC, Rosedean Zaily Dzulikli i tok.

Bipo long Parakings, Besta i bin sponsa bilong Besta Madang FC, tasol dispela yia i nogat wanpela tim bilong Madang long NSL.

SPOT RAUN
WANTAIM
Scott Vavine, ML



Lainim sampela samting long wol sempion pawalifta, Dobi Mea

BIPO long mi go moa long toktok bilong mi long hia, mi laik tok amamas long Dobi Mea, presiden bilong em, papamama bilong em, kosa na tu ol sapota bilong em, long helpim em i go na winim bikipela luk-save long spot bilong em.

Taim yu winim wanpela bikipela awot, taitol o luk-save olsem long spot bilong yu, em bai kamap olsem wanpela bikipela mak long laip bilong yu.

Dispela em wanem samting nau wol sempion bilong yumi, Dobi i mekim.

Taim wanpela spotmanmeri kamap olsem wol sempion, em i soim olsem em i nambawan spotsmanmeri long wol long dispela spot long divisin bilong em.

Dobi soim dispela nau taim em i kamap olsem wol sempion bilong pawa lifting (power lifting) bilong ol meri.

Mi amamas long PNG Pawalifting Federesen (PNGPLF) long olgeta wok ol i mekim long helpim Dobi go pilai na win, tasol mi i gat wanpela asking long ol nau.

Dispela askim em isi. Mi laik save long wanem kain ol divelopmen program ol i gat long ol arapela ples long kantri.

Ol i mas wok strong nau long kisim dispela spot i go aut long ol arapela ples long kantri.

Em i gutpela taim nau long karim dispela spot i go aut long ol arapela ples long kantri na PNGPLF i noken pulim taim.

Bikipela luksave na hat wok bilong ol i mas go nau long divelopmen bilong dispela spot.

Dispela spot i no bikipela tumas tu long Mosbi, olsem na wok i mas kamap long skulim moa manmeri long biktaun long save long dispela spot bipo ol i go aut long ol arapela provins.

Olgeta strong na save bilong PNGPLF nau i mas go long mekim dispela spot i kamap long soim tru hatwok bilong wol sempion bilong yumi.

Dispela bai mekim pawalifting i kamap na hatwok bilong Dobi bai no inap go nating.

Wanpela moa taim mi laik tok amamas long Dobi long winim dispela bikipela luksave na awot long spot bilong em.

Harlies i kam bek nau

Andrew Molen i raitim

HEBOU Harlequins insait long Pot Mosbi ragbi union resis i kam bek bihain long 5-pela yia long winim namba 12 primiasip taitol bilong ol las wik Sarere.

Dispela win bilong ol i kam bihain long ol i daunim Defence 24-11 long Bava Park.

Harlequins i no givim sans long POMRFU dispela yia we i lukim ol i winim gren fainol long tripela divisen wantaim, B Gred, A Gred na primia divisen.

Defence i kam insait strong bihain long ol i winim primia bilong 2008, Easiloans University Piggies tasol ol i no bin inap long save na strong bilong Harlequins long dispela de.

Ol i wokhat tasol ol bikipela fowet bilong Harlequins i mekim-save long ol Defence na dispela i helpim ol i win.



RON: Wanpela Defence pilaia i painim rot long banis bilong ol Harlequins long gren fainol las wik. *Poto: Andrew Molen*



S P O T S

Isu 1832

Wan wik: Septemba 17 - 23, 2009.

KEPTEN: PNG anda 19 Garamuts kepten, John Boge Reva (bikpela piksa) wantaim tim bilong em (daunblo) i kisim PNG go insait long kriket wol kap gen.

U19 Garamuts amamasim PNG Stap insait long 2010 wol kap



PAPUA Niugini Anda 19 kriket tim, Garamuts i pinis long namba tri ples long Canada bihain long ol i winim Netherlands wantaim 86 rans. Ol Garamuts i pinis bihain long

Ailan (Ireland) na Afganistan (Afghanistan). Dispela gutpela ron bilong PNG i givim ol sans long stap insait long anda 19 wol kap kriket resis we bai kamap long Nu Silan (New Zealand) long 2010. Long dispela gem agensim

Netherlands, Heni Siaka i paitim 103 ran long helpim PNG win wantaim 254 rans insait long 50 ova na 7-pela bilong ol tasol i aut. Dispela i lukim tu Lucas Brouwers na Tim Gruitjers bilong Netherlands, wanwan i autim tripela PNG pilaia. **Moa long Pes 30.**



Moa long Pes 30.

INSAIT: Stadium em gutpela long soka. **Pes 31.** Salens bilong Besta Parakings. **Pes 31** Lahanis no wari long Rangers. **Pes 28.**

WINIM ISUZU

BAIM WANPELA ISUZU N SERIES TRAK NA STAP INSAIT LONG DRO LONG

Hariap Promosen bai pinis long 30th Septemba

Manimak em **K106,000** WINIM DRAIV AWEI **WANPELA NPR PMV TRAK**

*OL TEMS NA KONDISEN I STAP LONG DISPELA RESIS PHOTO FOR ILLUSTRATION PURPOSE ONLY

PORT MORESBY Ph: 325 5255 LAE Ph: 472 1144 MT HAGEN Ph: 542 1933 RABAUL Ph: 982 8193 Email: info@borokomotors.com.pg
KIMBE Ph: 983 5035 TABUBIL Ph: 548 9048 MADANG Ph: 852 2659 Website: www.borokomotors.com.pg



BOROKO MOTORS MEMBER